

9.2.2011

Päniuoddâr hoittám já kevttimvuávámist keččâleh Akwé:Kon -ravvuid

Algâalmugij ärbivuáválii tiädu kyeskee biodiversiteetsopâmuš 8j artiklan lohtâseijee Akwé:Kon -ravvuuh láá valdum keččâlemkiävtun Päniuoddâr meccikuávlu hoittám já kevttimvuávám târhistem ohtâvuodâst.

Akwé:Kon ravvuuh láá tuhhiittum biodiversiteetsopâmuš 5. uásipeličuákkimist. Akwé:Kon -ravvuuh láá vuosâsajasávt monâttállâmvyehi tâi prooses, mon pehti torvejuvvojev sâmmilij vaikuttemmáhdulâšvuodah hoittám já kevttimvuávám ráhtimist jáoccojev vyevih, moi pehti puáhtá coggâđ negatiivlijd vaikuttâsâid sâmikulttuurân.

Sämitige tiädui mielđ lii Meccihaldättâs vuossâmuš virgeomâhâš ubâ mailmist, mii heivit täid ravvuid.

Sierânâs pargojuávkku valmâštâl

Sämitigge já Meccihaldättâs lává ráđádâlmijnis puáttám tom mielân, et sierânâs pargojuávkku valmâštâl Akwé:Kon -ravvui heiviitem Päniuoddâr meccikuávlu hoittám já kevttimvuávám ráhtimist. Sämitige stivrâ lii nomâttâm pargojuávhu já tot lii tievâsmittum palgâsij ovdâsteijeiguin. Pargojuávhu saavâjodetteijen tuáimá Heikki Paltto já eres jesâneh láá Juhani Länsman, Bigga-Helena Magga, Nina Maarit West já Inga-Briitta Magga sehe puásui-išedeh: Jouni Lukkari (Päniuoddâr), Harri Hirvasvuopio (Säämi paalgâs), Nils-Heikki Näkkäläjärvi (Sallâvääri).

Pargojuávhu saavâjodetteijee Heikki Paltto osko, et taat lii šiev vyehi aasij vuávámist.

– Taat addel páihálijd ulmuid máhdulâšvuodâ toos, et sij šaddeh kuulluđ. Monâttállâmvyehi puáhtá meiddei ávusvuodâ vuávámân, pááhud Paltto.

Vaikuttâsâid sâmikulttuurân puáhtá árvuštállâđ ubâ vuávámprooses ääigi

Meccihaldättâs haalijđ väldiđ vuotân sâmmilij kulttuur hárjuttem iävtuid nuuvt pyereest ko máhdulâš.

– Ravvui keččâlem Päniuoddâr hoittám já kevttimvuávámist lii Meccihaldättâsân tehálâš.

Merhâšittee iäru ovdebáá vuávámpeargon lii tot, et árvuštállâm tahhoo ubâ vuávámprooses ääigi, ko ovdeláá árvuštállâm čuosâi valmâš vuávám vaikuttâsâid sâmikulttuurân, muštâl kuávluhovdá Elina Stolt.

Sâmmilij vuoigâđvuodâsajattuv já sâmikuávlu eennâmkevttim vuávám oovdedmân Akwé:Kon -ravvuin lii stuorrâ vaikuttâs.

– Jis Päniuoddâr hoittám já kevttimvuávám valmâštállâm luhostuvá pyereest, te Akwé:Kon -ravvui heiviitem puáhtá väldiđ uassin eres hoittám já kevttimvuávámij ráhtimáid já meiddei luándurigodâhvuávámij ráhtimáid, suogârdâl sämitige saavâjodetteijee Klemetti Näkkäläjärvi.

Päniuoddâr hoittám já kevttimvuávám târhistem valmâštállâm pištá aainâs taan ive já táárbumield pargo juátkoo puáttée ive.

Iävtutátuliih ravvuuh láá nomâttum toi olesvâldálii luándu tiäddudmân mohawkkieđ edâlduvvâin Akwé:Kon, mii uáivild puoh aasijđ luomâkodeest.

Lasetiäduh:

Kuávluhovdá Elina Stolt, Meccihaldättâs, 0400 398 983

Saavâjodetteijee Klemetti Näkkäläjärvi, Sämitigge, 050 524 2109

Lasetiädu Akwé:Kon -ravvuin sämitige nettisijđoin www.samediggi.fi/art8j

